

Dumonda Bigliel concernent la strategia da digitalisaziun en la furmaziun: mesirabladad e controlla da success en il rom dal Plan d'instrucziun 21

Ils 15 da mars 2016 ha la Regenza grischuna approvà il Plan d'instrucziun 21 GR inclusiv las tavlas da lecziuns. Il nov plan d'instrucziun è entrà en vigur l'onn da scola 2018/19 per las scolinas, per las scolas primaras sco er per las 1. e 2. classas dal stgalim secundar I. L'onn da scola 2019/20 vegn el realisà sin basa da directivas correspundentas en la 3. classa dal stgalim secundar I.

Il Plan d'instrucziun 21 fixescha las finamiras per l'instrucziun sin tut ils stgalims da la scola populara ed è in instrument da planisaziun per las persunas d'instrucziun, per las scolas e per las autoritads da furmaziun. Ultra da quai cuntegna il Plan d'instrucziun 21 ils plans d'instrucziun per ils moduls «medias ed informatica» ed «orientaziun professiunala». Quests moduls cuntegnan incumbensas interdisciplinaras da la scola e garanteschon in svilup sistematic da las cumpetenzas per ina part centrala da questas incumbensas.

Cun il nov plan d'instrucziun survegn la digitalisaziun dapli paisa. En il modul «medias ed informatica» sa tracti per l'ina da tematisar e da reflectar il diever da las medias ordaifer la scola. Per l'autra duain las scolaras ed ils scolars vegnir preparads – cun cumpetenzas d'applicaziun e cun enconuschientschas fundamentalas d'informatica – per il mund professiunal. Tenor la Conferenza da las directuras e dals directurs da l'educaziun publica dals chantuns da la Svizra da l'ost e dal Principadi da Liechtenstein CDEP-ost sajan quellas numnadain ozendi «necessarias praticamain en mintga professiun».

Il modul «medias ed informatica» vegn integrà en il Plan d'instrucziun 21 sco suonda:

- En il ciclus I che cumpiglia ils emprims 4 onns inclusiv la scolina, na vegnan ils champs da cumpetenza medias ed informatica betg instruids sco rom autonom, mabain integrads en auters roms. Las finamiras da l'emprim ciclus èn per exempel, che las scolaras ed ils scolars emprendian d'utilisar medias en moda creativa ed adattada al stgalim e ch'els hajan in barat davart lur atgnas experienschas cun las medias.
- En ils ciclus II (3.–6. onn da scola) e III (stgalim secundar I) recumonda il Plan d'instrucziun 21 che las scolaras ed ils scolars frequentian almain 2 uras per emna «medias ed informatica» per pudair elavurar sistematicamain temas fundamentals centrals. Il Grischun n'ademplescha betg la pretensiun da la CDEP. I vegnan purschidas main uras ch'il dumber recumandà. Quai resorta da la lavur da perscrutaziun da l'Universitad da Friburg, ch'è vegnida publitgada il fanadur 2018 cun il titel «Realisaziun da la furmaziun mediala e digitala en ils chantuns».

En ses program da la Regenza per ils onns 2021 fin 2024 ha la Regenza grischuna formulà la finamira da rinforzar il Grischun sco lieu da furmaziun e da perscrutaziun. Tras quai duai il Grischun vegnir posiziunà sco chantun da muntogna innovativ e digital. «L'infrastructura digitala e la furmaziun da la populaziun en il sector da la digitalisaziun furman perquai ina basa fitg impurtanta per il svilup dal chantun», èsi formulà en il program da la Regenza.

Sut quest aspect vulan las sutsegnadras ed ils sutsegnaders savair da la Regenza:

1. Il svilup sistematic e la promoziun da cumpetenzas digitalas è correct ed impurtant, damai che umans giuvens ston pudair sa mover e sa cumprovar en il mund digital il pli tard sin il stgalim secundar II e suentar (emprendissadi, scola chantunala, studi). Correspundentamain èsi indispensabel da sviluppar las cumpetenzas digitalas durant il temp da la scola populara. Areguard il Plan d'instrucziun 21 ed areguard la finamira che la Regenza vul cuntanscher da preparar il lieu da furmaziun e da perscrutaziun per l'avvegnir digital, sa tschenta la dumonda: Cun tge metodica e tenor tge criteris ed indicaturs vegn il chantun Grischun a mesirar il success da la scola populara en connex cun il svilup e cun la promoziun da las cumpetenzas digitalas? Quai tut savend che l'Inspecturat da scola ha fatg dacurt ina inventarisaziun davart la realisaziun tenor las reglas dal Plan d'instrucziun 21. En quella è bain vegnì tematisà l'equipament da las scolas cun infrastruttura dad ICT, ma betg in instrument per mesirar il success dal modul «medias ed informatica».
2. Tenor il Plan da finanzas 2021 fin 2024 metta la Regenza a disposiziun mintga onn en media 38,6 milliuns francs per la scola populara. Quants da quests meds finansials vegnan previsiblamain duvrads per la digitalisaziun resp. per cuntanscher las finamiras tenor il program da la Regenza?

Grazia fitg per las respostas a nossas dumondas.

Cuira, ils 12 da favrer 2020

Bigliel, Cantieni, Gugelmann, Berther, Danuser, Epp, Gasser, Giacomelli, Hefti, Hitz-Rusch, Holzinger-Loretz, Kohler, Kunfermann, Kuoni, Lamprecht, Loepfe, Mittner, Pfäffli, Preisig, Rettich, Ruckstuhl, Stiffler, von Ballmoos, Waidacher, Widmer-Spreiter (Cuira), Zanetti (Sent)